

COMISIÓN INFORMATIVA DE POLÍTICAS SOCIAIS

ACTA da mencionada comisión informativa, correspondente ao día **19 de febreiro de 2025**
Ás 17.46 horas do día 19 de febreiro de 2025, reúnese a Comisión Informativa de Políticas Sociais, en sesión ordinaria, na sala de xuntas da Deputación Provincial, coa asistencia dos seguintes deputados e deputadas:

Presidente: D. Luís Menor Pérez

Deputados/as do Grupo Popular:

D. Rosendo Luís Fernández Fernández

D.^a Marta Nóvoa Iglesias

D.^a Patricia Torres Madureira

D.^a M.^a del Carmen González Quintela

D. Manuel Seoane Rodríguez

Deputados/as do Grupo Socialista:

D. Álvaro Vila Araújo

D.^a Susana Rodríguez Estévez

D. Aurentino Alonso Araújo

D. Emilio Luís Díaz Vidal

Deputados/as do BNG:

D.^a María José Mangane Guede

D. Xosé Manuel Puga González

Deputados de Democracia Ourensana:

D. Antonio Fernández Martín

D. Gonzalo Pérez Jácome

Secretario: D. Juan Marquina Fuentes

Interventora: D.^a Begoña Álvarez Matos

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

1º.- APROBACIÓN DA ACTA DA SESIÓN ANTERIOR, CORRESPONDENTE Á DO DÍA 21 DE XANEIRO DE 2025.-

A Secretaría Xeral deu traslado do borrador da acta da sesión anterior, correspondente á ordinaria do día 21 de xaneiro de 2025.

Non se producen intervencións e, por unanimidade, a comisión adopta o seguinte acordo:
Aprobar a acta da sesión ordinaria da Comisión Informativa de Políticas Sociais do día 21 de xaneiro de 2025, conforme co borrador elaborado pola Secretaría Xeral.

2º.- MOCIÓN DO GRUPO SOCIALISTA PARA GARANTIR A ESTABILIDADE E VIABILIDADE DAS CASAS NIÑO DA PROVINCIA DE OURENSE

D. Álvaro Vila Araujo, do Grupo Socialista, expón o contido da seguinte moción:

As “casa niño” son un modelo de atención dirixido a nenas e nenos de 0 a 3 anos, deseñado para municipios rurais de Galicia onde, por mor da baixa densidade de poboación, non resultan viables os servizos habituais de atención á primeira infancia. Este tipo de iniciativas aspiran a facilitar a conciliación familiar e laboral, ofrecendo unha entorna segura e adaptada para o desenvolvemento temperá dos máis novos. Xestionadas por profesionais autónomos, que ofrecen atención personalizada nun ambiente 100% familiar, cada casa e quen de atender ata cinco nenos de xeito simultáneo. A Xunta de Galicia financia a posta en marcha e o funcionamento destas instalacións, sendo crucial o rol do goberno autonómico na sustentabilidade das casas niño. A Consellería de Política Social e Igualdade ten incrementado o monto da súa contribución até os 29.000 euros anuais, introducindo unha aportación adicional de 1.500 euros para a renovación de equipamentos, se ben este monto apenas cubre os gastos operativos, ameazando a continuidade deste servizo esencial do noso rural.

Na provincia de Ourense as casas niño desenvolven un papel crucial na atención á infancia e á conciliación familiar, contribuíndo mesmo a fixar poboación, nomeadamente nas zonas máis despoboadas. Porén, os profesionais que xestionan estas instalacións teñen que facer fronte a dificultades económicas, sen apenas marxe de beneficio nin para afrontar eventuais imprevistos, sendo recorrentes as situacións de acentuada inestabilidade financeira. O aumento de custos operativos e gastos como os relacionados coa enerxía ou os seguros dificulta a xestión cotiá das casas niño, entoxándose insuficiente o feble incremento anual do 5% nas aportacións contemplado pola Xunta para este exercicio. A ausencia de persoal de substitución durante os períodos de baixa, enfermidade ou permiso tamén ameaza á propia subsistencia das e dos responsables das casas niño, implicando a interrupción do servizo. Doutra banda, a baixa densidade de poboación nalgunhas zonas rurais limita a demanda das casas niño, comprometendo a súa viabilidade a medio e longo prazo.

A Xunta de Galicia establece as bases reguladoras e convoca axudas para posta en marcha das casas niño, dirixidas a profesionais que desexen ofrecer este servizo en concellos

rurais. Esíxese unha formación ou experiencia profesional específica e impóñense requisitos e normas de seguridade nos inmobles. Os servizos inclúen unha atención integral e personalizada de balde na modalidade de atención diúrna, de luns a venres. A nosa provincia lidera en Galicia o número de casa niño, albergando case que o 50% do total de instalacións do país. Segundo datos de setembro de 2023, Ourense contaba con 46 instalacións en funcionamento. Ulteriormente, en agosto de 2024, a Xunta de Galicia autorizou a creación de seis novas casas niño na Comunidade, dous delas nos concellos de Padrenda e Entrimo. Con estas incorporacións, Ourense conta na actualidade con 48 instalacións operativas con capacidade para acoller a 240 nenas e nenos, consolidándose como a provincia galega con maior número de instalacións.

Se ben a financiación e seguimento das casas niño recae na administración autonómica, os concellos adoitan colaborar indirectamente a prol da consolidación e éxito desta iniciativa. Os municipios informan ás familias sobre a existencia das casas niño e a súa gratuidade, asesorando mesmo a potenciais emprendedores sobre os requisitos para poñer en marcha este tipo de instalacións e tramitando os permisos e licencias necesarias. Tamén poden proporcionar locais axeitados para a instalación dunha casa niño, axudando na adaptación de vivendas e locais para o cumprimento coa normativa de seguridade e accesibilidade. Os concellos fomentan a coordinación entre casas niño e outros servizos municipais (sanitarios, educativos e sociais), organizan actividades e obradoiros que reforzan a formación e socialización dos cativos, e traballan para conformar redes de apoio. Colaboran na busca de profesionais de substitución para evitar interrupción no servizo en casos de baixa e, malia a escaseza de recursos propios, mesmo chegan a outorgar axudas complementarias para gastos de diversa índole.

*Por todo o exposto o Grupo Provincial Socialista presenta a seguinte **PROPOSTA DE ACORDO**:*

PRIMEIRA.- Instar á Deputación de Ourense a demandar da Xunta de Galicia un incremento no financiamento e axudas dirixidas ás casas niño, que sexa consecuente e acaído coa auténtica realidade económica e necesidades das e dos profesionais que desenvolven un servizo tan crucial no rural da provincia de Ourense.

D^a María Mangana Guede, do BNG, sinala que o seu grupo está de acordo coas propostas desta moción se ben é posible que fagan algunha engádega ao respecto.

D^a Ana Patricia Torres Madureira, do Grupo Popular, manifesta a reserva de voto do seu grupo para o Pleno

Non se producen máis intervencións e co voto favorable do Grupo Socialista (4) e e a abstención do Grupo Popular (6), do BNG (2) e de DO (2), a comisión ditamina favorablemente a adopción, por parte do Pleno, do seguinte acordo:

PRIMEIRA.- Instar á Deputación de Ourense a demandar da Xunta de Galicia un incremento no financiamento e axudas dirixidas ás casas niño, que sexa consecuente e acaído coa auténtica realidade económica e necesidades das e dos profesionais que desenvolven un servizo tan crucial no rural da provincia de Ourense.

3º.- MOCIÓN DO GRUPO POPULAR RELATIVA AO APOIO AOS EMPREGADOS DA EMPRESA FAURECIA AUTOMOTIVE ESPAÑA, SA, DO POLÍGONO DE SAN CIBRAO DAS VIÑAS ANTE O SEU FUTURO INCERTO.

D.^a Ana Patricia Torres Madureira, do Grupo Popular, expón o contido da seguinte moción:

Un dos motores importantes na economía galega é o da automoción. En Galicia prodúcese un de cada catro vehículos ensamblados en España, pero a pesar destes datos, o sector afrontase a incertezas debido a electrificación, a aposta por unha mobilidade máis sostible, novas normativas e á competencia de países cun baixo custo de produción.

En concreto entre 2019 e 2023 a produción europea de automóviles caeu un 16% mentres en Asia se viu incrementado nun 12% .

Prevese un crecemento case nulo en Europa, ao tempo que no resto do mundo progresará en torno ó 9% no período 2023-2030. Estes datos non son esperanzadores para un sector desta importancia en Galicia.

En Ourense o sector da automoción é estratéxico por a súa proximidade a industria de Vigo. É unha provincia na que as empresas auxiliares da automoción teñen un peso moi importante, contamos con numerosas compañías como é a compañía Faurecia Automotive España S.A, sita no Polígono de San Cibrao das Viñas, propiedade de Forvia, a cal fabrica paneis de porta, taboleiros de a bordo, guarnicións e ebanistería para os automóviles. Conta a día de hoxe con case 300 empregados que traballan de maneira exclusiva para Stellantis. Estes empregados da compañía francesa están a ver perigar os seus postos de traballo por a caída da produción automobilística e o estancamento previsto de cara ó 2030, debido a isto non se están a renovar os postos dos que se xubilan e vanse ver reducidos inmediatamente e de forma drástica a contratación e o reaxuste de plantillas.

Ademáis disto Stellantis retirou a adxudicación dun novo vehículo a planta de Ourense trasladándoo a un país low cost e decidir de non seguir coa continuidade do Peugeot 2008, o que suporá que a carga de traballo que tiñan ata 2028 chega ao seu fin.

Son moitas as empresas que están a ver reducida a súa carga de traballo, e viven coa incerteza de se van a ter ou non pedidos de empresas como Stellantis que a pesares de beneficiarse de fondos europeos a través do PERTE do vehículo eléctrico, non reflexa o apoio en Galicia e na provincia de Ourense, se non que deslocaliza a outros países nos que a man de obra é máis barata.

No se debe permitir que un dos motores principais de Galicia e da nosa provincia se desmantele. Debemos protexelo sector fronte outras potencias, con actividade industrial e con proxectos.

ACORDOS:

- 1. Instar ao Grupo FORVIA a garantir o mantemento dos postos de traballo do persoal que actualmente forma parte da empresa.*
- 2. Instar a Xunta de Galicia que reclame ao Goberno Central que deseñe convocatorias de axudas para o sector da automoción e industrias auxiliares que garantan o emprego de proximidade e eviten a deslocalización.*

D^a María Mangana Guede, do BNG, sinala que temos un problema moi serio co emprego industrial na nosa provincia e que FAURECIA é un claro exemplo. Sinala que debemos adoptar medidas que freen a deslocalización da produción na nosa provincia, xa que 314 postos de traballo están en serio perigo e nos deben preocupar a todos. Todos os representantes políticos debemos poñer todo da nosa parte para conseguir o mantemento e incluso o incremento de emprego industrial na provincia de Ourense. Manifesta o seu apoio aos traballadores afectados e ás súas familias

D. Álvaro Vila Araújo, do Grupo Socialista, sinala que a exposición de motivos desta moción non concorda moito coas propostas de acordo que se someten a votación. En todo caso indica que se debería preguntar polo papel que fai en todo isto a Xunta de Galicia que é administración con competencias plenas en industria e en emprego, e que non pode ser un actor pasivo ante este escenario. Remata reiterando o apoio do seu grupos aos traballadores afectados e ás súas familias.

D.^a Marta Nóvoa Iglesias, do Grupo Popular, toma a palabra para indicar que debemos cuestionarnos como a UE está a asumir a velocidade do paso ao vehículo eléctrico, xa que quizás nos esteamos equivocando. É evidente que o cambio de modelo está a provocar un descenso da demanda polas incertezas que iso produce, e isto pode ter moita afectación nos principais países produtores de vehículos na UE que son Alemaña, Italia e España, lembrando que un de catro vehículos que se fabrican en España saen de Galicia. Respecto á Xunta lembra que aprobou e está a aplicar un Plan Director de apoio ao sector da

automoción vixente ata 2027. Por último sinala as súas dúbidas sobre a intervención do BNG, xa que este grupo tense amosado en contra das empresas e dos grandes investimentos industriais en Galicia.

D^a María Mangana Guede, do BNG, aclara que o seu grupo está en contra da industria soamente cando esquilman ao noso territorio, como é o caso de ALTRI. Engade que a Deputación aínda ten deberes pendentes, como é dar cumprimento ao acordo do Pleno que apostaba por crear unha mesa sectorial de traballo para o desenvolvemento económico da provincia, polo que o grupo de goberno debe poñerse a iso de inmediato.

D. Álvaro Vila Araújo, do Grupo Socialista, intervéñ para sinalar que a falla de solo industrial na nosa provincia non pode ser a escusa da Xunta de Galicia, cando ten expropiados para uso industrial máis dun millón de metros cadrados en Paderne de Allariz e Taboadela, engadindo que é moi triste que ese chan industrial non estea no mercado e estea cheo de toxos e silvas.

D^a Marta Nóvoa Iglesias, do Grupo Popular, remata o debate indicando que para o desenvolvemento de chan industrial os problemas veñen case sempre dados polos mesmos organismos, en particular pola CH do Miño-Sil.

Non se producen máis intervencións e co voto favorable do Grupo Popular (6) e e a abstención do Grupo Socialista (4), do BNG (2) e de DO (2), a comisión ditamina favorablemente a adopción, por parte do Pleno, do seguinte acordo:

1. Instar ao Grupo FORVIA a garantir o mantemento dos postos de traballo do persoal que actualmente forma parte da empresa.
2. Instar a Xunta de Galicia que reclame ao Goberno Central que deseñe convocatorias de axudas para o sector da automoción e industrias auxiliares que garantan o emprego de proximidade e eviten a deslocalización.

4º.- MOCIÓNS DE URXENCIA.- Non se presentan.

5º.- ROGOS E PREGUNTAS.- Non se formulan.

E, ás 18.19 horas, dáse por finalizada a reunión, redactándose a presente acta que se asinará electronicamente. Dou fe.

